



Ի ՓԱՌՍ ՀԱՎԱՏԻ ԵՎ ՀԱՅՐԵՆՅԱՑ

Այն հեռավոր 301 թվականից, երբ Սուրբ Գրիգոր Լուսավորիչը, զորակցությամբ Տրդատ Մեծ արքայի, քրիստոնեական հավատքը հաստատեց Հայոց աշխարհում որպես պետական ու մշտնջենական կրոն, արդեն 1700 տարի իր ամենահաղթ խաչը բարձր է պարզել հայոց առաքելավես Եկեղեցին, քանզի այդ մեծ ու հզոր կառույցի հիմքերն էին դրել Տիրոջ կողմից Արևելք ու Հայոց աշխարհ առաքված Թադեոս և Բարդուղիմեոս առաքյալները, Հիսուսի աշակերտներն ու սրանց աշակերտները: Եվ մեր սուրբ Եկեղեցին առաքելաշավիղ դարձավ, քանզի հենց Տիրոջ կենդանության ժամանակներից ընթացավ այդ ուղիով: Եվ մեր հավատքի հաստատուն վեմը դարձավ Սուրբ Գրիգոր Լուսավորչի աննման տեսիլքով ձև ու մարմին առած Սուրբ Էջմիածնի տաճարը: Այնուհետև տեսիլք երևաց արքայիս, և Աստուծո հրեշտակն ասում էր. «Պետք է, որ դուք առանց հապաղելու Գրիգորին քահանայապետության պաշտոնը տաք, որպեսզի մկրտությամբ լուսավորի ձեզ»: Տեսիլքը երևաց սրբին, ու հրեշտակն ասում էր. «Քրիստոսից է այդ հրամայված քեզ»:

Ուրեմն հայոց մեր առաջին եպիսկոպոսապետը առաջին հերթին Աստվածընտիր էր և նոր միայն՝ Ազգընտիր: Իսկ վերջինս, որ ասվում է մինչև այսօր Հայոց Հայրապետների համար, գեղեցիկ արտահայտությունն չէ, այլ այն իրողությունն է, որ մեծ մասամբ, ավելի կամ պակաս չափով կատարվել է նրանց ընտրության ժամանակ, և Հայոց Եկեղեցին ու ազգը մշտապես, եթե չար ժամանակներն ու հանգամանքները խանգարիչ չեն եղել, հավատարիմ են մնացել այս ավանդական կարգին: Ծիշտ է, թեև Սուրբ Լուսավորչից հետո մի որոշ շրջան կաթողիկոսությունը դարձավ ժառանգական նրա տոհմի համար, սակայն արքաները նոր Հովվապետ կարգելիս անպայման ստանում էին թե՛ հոգևոր դասի և թե՛ նշանավոր աշխարհականների համաձայնությունը, խորհրդակցում նրանց հետ:

Իսկ երբ թշնամիներից հաջողվեց վերացնել թագավորական իշխանությունը մեր երկրից, և պատմության ասպարեզից դուրս մղվեցին Արշակունիները, բարձրաստիճան հոգևորականներն ու ազնվական դասն ստեղծեցին համատեղ խորհուրդներ, որպեսզի միասնաբար քննարկեն ու լուծեն ազգային-եկեղեցական կարևորագույն հարցերը:

444 թվականին եղավ Շահապիվանի ժողովը, որն իրավամբ ազգային-եկեղեցական էր, և նրան մասնակցում էին ոչ միայն հոգևորականները,

այլև նախարարներն ու գորականները: Իսկ ժողովը հավաքվել էր մի շատ կարևոր խնդրով՝ աահմանելու Հայոց աշխարհում օգտագործվելիք եկեղեցական կանոնները: Այն դժվարին ժամանակներում, երբ վերացել էր Արշակունյաց գահատոհմը, հոգևոր ու աշխարհիկ իշխանության միասնության մի փայլուն վկայություն էր սա: Այս ժողովն էր, որ օրինակ ծառայեց 449-ի Արտաշատի ժողովին, որը գումարվեց շատ տագնապալի առիթով՝ պատասխան տալու պարսից արքունիքին՝ կրոնափոխության առթիվ սրա հրամանին: Եվ ըստ ոսկեշուրթ Եղիշեի՝ նրան մասնակցում էին բոլոր եպիսկոպոսները, բազմաթիվ քորեպիսկոպոսներ, պատվական երեցներ, մեծամեծ նախարարներ: Ու նաև այս ժողովում էր, որ ներկաները մեծ բազմության ներկայությամբ ու հավանությամբ հավաստեցին ու հայտարարեցին իրենց բացառիկ նվիրվածությունը քրիստոնեական հավատքին ու հայրենի երկրին. «Այս հավատից մեզ ոչ ոք չի կարող խախտել, ո՛չ հրեշտակները և ո՛չ մարդիկ, ո՛չ սուրը և ո՛չ հուրը, ո՛չ ջուրը և ո՛չ էլ որևէ այլ դառն հարված»:

Եվ դա հաստատեցին ոչ միայն գրչով, այլև երկու տարի անց Ավարայրում իրենց սուրբ արյունով:

Դարերի հոլովույթի մեջ նվիրական ու անսասան էր մնում Կաթողիկոսական Աթոռը, որքան էլ պատմական տարուբերումներ լինեին ու չար հողմեր փչեին: Եվ այդ Աթոռն էր գլխավորելու հայոց քրիստոնեությունը, և այդ քրիստոնեությունն էր պահելու ազգ ու հայրենիք, լեզու և մշակույթ, ազատասիրական ձգտումներն ու պետականության հույս-երազանքը: Իսկ Ազգային-Եկեղեցական ժողովները շարունակվում էին գումարվել: Տեղի էին ունենում նաև արաբական տիրապետության շրջանում: Եվ եթե հարկ էր լինում՝ ընդդիմանում էին օտար բռնակալների ու կառավարիչների կամքին: Այդպես եղավ 840 թ., երբ արաբական կառավարիչը Հովհաննես Դ Ովայեցուն գրկեց Հայրապետական Աթոռից: Իշխանաց և եպիսկոպոսաց ժողովը նրան վերահաստատեց իր գահին:

Բագրատունի թագավորներն սկզբնական շրջանում իրենք էին նշանակում Հայրապետին՝ իհարկե խորհրդակցելով շրջապատի հետ, սակայն ահա Մաշտոց Եղիվարդեցուն արդեն ժողովն ընտրեց Կաթողիկոս: Ինչպես վկայում է Հովհաննես Դրասխանակերտցին, «թագավորը, ավագ իշխանները և անվանի ազատները նրան նստեցրին Լուսավորչի Աթոռին»: Իսկ երբ նա յոթ ամիս անց վախճանվեց, կրկին հավաքվեցին նախարարները և թագավորի հետ միասին ընտրեցին Դրասխանակերտցուն: Եվ բնավ էլ պատահական չէ, որ Դրասխանակերտցին հատուկ շեշտել է նախարարների ներկայությունը: Դա արել է միտումնավոր, որպեսզի ցույց տա, թե նրանք եթե Կաթողիկոս են ընտրում, ուրեմն պարտ են մտահոգ լինել Եկեղեցու պայծառության համար: Եվ դա կարող է լինել միայն ու միայն ազգային միաբանությամբ՝ մի կողմ դնելով անձնական հաշիվներն ու քեն-վեները:

Հետագայում այդպիսի ժողովներ սկսեցին գումարվել և կիլիկյան Հայաստանում: Այսպես, եպիսկոպոսների և իշխանների համատեղ խորհրդում Կաթողիկոս ընտրվեց Կոստանդին Ա Բարձրաբերդցին (1221—1267): Այդ տեղի ունեցավ 1220 թ. և փաստորեն վերահաստատումն էր Կաթողիկոսի ընտրության ավանդական կարգի: Եվ, հենց այս Հայրապետին էր վիճակված կոչվելու Ամենայն Հայոց Կաթողիկոս:

484 թ. Կաթողիկոսական Աթոռը Վաղարշապատից փոխադրվել էր Դվին, ապա աստանդական դարձել, մինչև հաստատվել էր Կիլիկիայում:

Իսկ երբ վերացավ պետականությունը Կիլիկյան հողում, արդեն անհրաժեշտություն դարձավ այն կրկին Վաղարշապատում՝ Սուրբ Էջմիածնում հաստատելը: Եվ ահա եկավ ցանկալի ու բաղձալի օրը: Դա 1441 թվականն էր, երբ կրկին կաթողիկոսական կենտրոն էր դառնում Սուրբ Էջմիածինը: Ցնծագին գալիս էին Հայաստան աշխարհի բոլոր կողմերից՝ ներկա լինելու այդ մեծ տոնին, քանզի ժամանակի լուսամիտ այրերը դրա մեջ էին տեսնում ազգը միավորելու մի կարևոր ազդակ: Բանասեր Կարապետ Կոստանյանն այդ մասին այսպես է գրում. «Վաղարշապատ դիմող կրոնավորներն երևցնում են իրենց գիտակցական ձգտումը Հայոց Մայր Եկեղեցու դարավոր սուգը փարատել, որովհետև նրա մեջ էին մարմնացած ամբողջ ազգի գոյության և նորոգության գաղափարը»: Իսկ Թովմա Մեծփեցին Սուրբ Էջմիածնի համար կասի. «Քրիստոսադիր Աթոռն մեր հայրենի»:

Եվ ահա այդ ժողովից հետո Ամենայն Հայոց Կաթողիկոս դարձավ Կիրակոս Ա Վիրապեցին: Ժողովը եղել է խիստ բազմամարդ, և առաջին անգամ վկայություն ենք գտնում, թե մասնակցել են նաև կանայք: Հետաքրքրական փաստ է և վկայում է մեր Եկեղեցու լայնախոհության մասին: Եղել են դեպքեր, երբ Եկեղեցու պայծառացմանը նպաստելու բարի նպատակով աշխարհիկ անձինք են նախաձեռնել կաթողիկոսի ընտրությանը: Այդպես եղավ 1628-ին, երբ ընտրվեց Մովսես Տաթևացին: Նա էլ վերականգնեց վանական կյանքը և զարկ տվեց լուսավորությանը: Իսկ նրան եթե չընտրեցին այլ վայրերից եկած պատվիրակները, ապա դա կատարվեց բոլոր գաղթօջախներից ստացված պատասխան համաձայնական մամակների միջոցով: Իսկ սա նշանակում է, որ կաթողիկոսական ընտրություններին ստեղծված պայմաններում մասնակցում էին համարյա բոլոր գաղթօջախները: Իսկ ընտրությունը Մայր Աթոռում կատարվեց հոգևորականների և աշխարհականների մեծ բազմության ներկայությամբ: Այդ կերպ ընտրվեց նաև նրան հաջորդած Փիլիպոս Կաթողիկոսը:

18-րդ դարում կաթողիկոսական ընտրության նախաձեռնությունը պատկանում էր Սպահանի մեծատուններին, 19-րդ դարում այդ դերն անցավ Կոստանդնուպոլսին, որի Պատրիարքարանի և մեծամեծների համաձայնությունը պարտադիր էր: Սակայն շուտով այս սուրբ գործն ընկավ քաղաքական ոլորտ, ուր բախվում էին պարսիկների, թուրքերի, իսկ 1800 թվականից արդեն՝ ռուսական արքունիքի շահերը:

Ռուսական կառավարության 1836 թ. նախաձեռնած «Պոլոժենիայի» (կանոնադրության) ընդունման, նպատակն էր որոշակի դարձնել հարաբերությունները ռուսական կառավարության և Հայոց Եկեղեցու միջև: Իհարկե տիրողները շատ հաճախ էին ստիպված լինում հաշվի նստել նաև ժողովրդի միասնական կամքի հետ:

«Պոլոժենիան» գործեց փաստորեն մինչև 1911 թվականը, երբ կատարվեց վերջին ընտրությունը, հետո նոր կանոնադրություններ մշակվեցին, որոնք գործում են առ այսօր: Իսկ որ այսօր հասունացած խնդիր է եկեղեցական նոր սահմանադրություն ունենալը, դա փաստ է: Իսկ որ դա պիտի ընդունի և հաստատի Ազգային-Եկեղեցական Ժողովը, դա էլ քրեմարկման ենթակա չէ: Դա պիտի ընդունի երկու տարի անց գումարվելիք ժողովը:

Ամա այսպիսին է եղել այն ժողովի անցած դարավոր ճանապարհը, որն այսօր կոչվում է Ազգային-Եկեղեցական: Եվ պատահական չէ, որ ազգայինը շեշտվում է առաջինը: Զե՛ որ այն իր նպատակներով ավելին՝ համազգային է և նպատակն է ոչ միայն եկեղեցական զանազան խնդիրների ճշտումը, մոտ որոշումների ընդունումը, այլև առաջին հերթին՝ ազգի միավորումն ու միասնականության պայանդումը մոտ պայմաններում՝ մերձակա և հեռավոր գաղթօջախների առկայության պայմաններում:

Միշտ էլ մեր սուրբ Եկեղեցին է կատարել այդ ազգամիավորիչ դերը: Մեծ վիպասան Ռաֆֆին իր «Կալծեր» վեպում, Վասպուրականի Տիրամոր վանքի ուխտագնացության առիթով, վշտանալով հայոց բաժան-բաժան նակատագրի համար, գրել է, «Բայց մի կապ, որ դեռ պահպանվել էր, մի կապ, որ միավորում էր այն խորտակված ամբողջության զանազան կտորտանքը, մի կապ, որին չէր կարողացել խփել բռնակալի սուրբ, դա էր՝ կրոնքը և Եկեղեցին»:

Եվ ամա այժմ էլ հենց Եկեղեցին է միավորիչը հայության տարբեր հատվածների, իր սրբազումար Ազգային-Եկեղեցական ժողովով: Այդ մասին որքան լավ է ասել Մեծի Տանն Կիլիկիո երջանկահիշատակ Գարեգին Ա Կաթողիկոսը Գևորգ Զ Հայրապետի ընտրության առիթով գումարված ժողովի մասին (1945 թ.): «Այս ակնհայտնի, ամենքի համար տեսանելի և հասկանալի արտաքին ապացույցն էր, թե հայ ժողովրդի համար որքան մոտ է Հայաստանյայց Եկեղեցին յուր Մայր Աթոռով և Ամենայն Հայոց Հայրապետությամբ, որ իբրև մագնիսական ուժ իրար է բերել այդպիսի հոծ թվով ներկայացուցչությունն աշխարհի ամեն անկյուններից, ուր հայություն կա խմբված»:

Այդպիսին էր և այն ժողովը, որը գումարվեց սույն թվականի ապրիլի 8-ին Հայոց մոտ Հայրապետի ընտրության բարեբախտիկ առիթով: Այն կմնա թե՛ Եկեղեցու և թե՛ ընդհանրապես ժողովրդի պատմության մեջ իբրև հայոց պետականության անկախության պայմաններում գումարված ժողով, որն այսօրվա բարդ ու դժվարին ջրերում պիտի տար շատ հարցերի պատասխանը, որոնցից գերազույնը Լուսավորչի գահի 181-րդ գահակալի ընտրությունն էր: Ընտրությունը մի գահակալի, որի ուներին պիտի ընկներ Հայ Եկեղեցին բարեկարգելը և բարեզարդելը, այս դժվարին ժամանակներում ազգը ավելի միավորելը և նրա բոլոր հատվածների ջանքերը Մայր Հայրենիքի բարեշինությանը ծառայեցնելը և շատ ու շատ այլ հոգսեր: Եվ ամա այդ գիտակցությամբ էր, որ նորընտիր և ազգընտիր Կաթողիկոս Գարեգին Առաջինն ստանձնեց իր հավատացյալ հոտի հովվությունը՝ կաթողիկոսական գահակալության առթիվ իր քարոզում ասելով, «Տասնութ տարիներ կաթողեկոսության այդ լուծը կրեցի Մեծի Տանն Կիլիկիո Կաթողիկոսության գահին վրա և այժմ ավելի բարձր պատասխանատվությամբ գայն պիտի կրեմ Լուսավորչականույց այս սրբազնագույն գահին վրա, Ամենայն Հայոց Կաթողիկոսության Մայր Աթոռին ի Ս. Էջմիածին»:

Այդ, ծանր, շատ ծանր բեռ ընկավ նորընտիր Վեհափառի ուսերին: Սակայն նա սովոր է դրան, 1949 թվականից ի վեր լինելով հոգևոր զանազան պաշտոններում և ունենալով հոգևոր զանազան աստիճաններ, նա ապացուցել է իր քաջատիկ նվիրվածությունը Եկեղեցուն ու Ազգին: Իսկ 18 տարի լինելով Մեծի Տանն Կիլիկիո Կաթողիկոս, զարկ տվեց ազգային-կրոնական, մշակութային-շինարարական աշխատանքներին: Այժմ մեր ընդհանրական Եկեղեցուն հենց այդպիսի անխոնջ ու նվիրյալ Վեհ է հարկա-

վոր, որը կամորձն Աստուծո ընտրվեց: Այժմ Մայր Աթոռը պետք է ծավալի և՛ շինարարական-կառուցողական, և թե՛ ազգային-մշակութային աշխատանքներ: Զմտամանք ու լավ հիշենք, որ մրա կաթողիկոսության տարիներին հրատարակվել են 350 հատոր կազմող պատմա-բանասիրական, կրոնական, աստվածաբանական խիստ ջանեկան աշխատություններ:

Դարեր շարունակ Եկեղեցին է հովանավորել, մրա ներսում են գարգացել հայկական գրչությունը, գրքարվեստը, աստվածաբանական ու հայրաբանական, հայագիտական միտքը: Սակայն վերջին տասնամյակների մեղքով, ման վերջին տարիների ամենեկի հապաղման պատճառով Մայր Աթոռն, ավաղ, կորցրել էր առաջին հերթին իրեն վերապահված այդ դերը: Եվ այժմ արդեն հրամայական անհրաժեշտություն է վերականգնել այդ դերը և վերադառնալով հրատարակչական ավանդներին՝ լույս ընծայել մեր Եկեղեցու դավանաբանությունից բխող գործերի միջնադարյան աստվածաբանական բնագրերը՝ գուգանեոսաբար աշխարհաբարի վերածած: Պարզ է, որ անհրաժեշտ է այդ գործերը ներկա ընթերցողին մատուցել դյուրընկալի ձևով, ինչպես ման, հաշվի առնելով այսօրվա հրատարակչական ոչ դյուրին պայմանները, նախատել հայագիտության զարգացմանը, որը միշտ էլ մեր սուրբ Եկեղեցու առաջնահերթ խնդիրներից է եղել, հրատարակելով այն ուսումնասիրություններն ու աշխատությունները, որոնք հարաբերվում են եկեղեցական պատմությանն ու մշակույթին: Ինքը Վեհափառք բեղում գրչի տեր է և հեղինակ գրական-աստվածաբանական բազմաթիվ գրքերի ու հոդվածների, որոնք լույս են տեսել և այլ լեզուներով:

2001 թվականը շատ կարևոր թվական է դառնալու մեր Եկեղեցու և ժողովրդի կյանքում: Ապրիլի 5-ի Ազգային-Եկեղեցական Ժողովի չորրորդ նիստում Վեհափառ Հայրապետն իր խոսքում ասաց, թե մեր առաջին նպատակը պետք է լինի Հայաստանում որպես պետական կրոն քրիստոնեության հաստատման 1700-ամյակին նախապատրաստվելը: Ի շարունակություն այդ մտքի ասվեց, «Ծառ Եկեղեցիներ ու կազմակերպություններ այսօր՝ 2000-ամյակի ավարտին և 3000-ամյակի շեմին, տեսապես մտածում են, թե ինչպես թարմացնեն, բարոյապես առողջացնեն իրենց ներքին կյանքը, մենք նույնպես պարտավորություն ունենք ամենայն լըրջությամբ զբաղվելու այդ աշխատանքներով»:

Իսկ անելիքները շատ ու շատ են և ծառացած խնդիրները՝ բազմաթիվ: Այո, մեծ կարևորություն է ստացել այսօր հոգևոր կյանքի բարեկրթությունը: Սակայն ոչ այնպես, ինչպես հրամցնում են որոշ նորամասն «քարեննորոգիչ տեսաբաններ», այդ պատկերացնելով լյութերական ռեֆորմացիայի ձևով, այլ բարեկրթոգել՝ անխաթար պանելով Հայ Եկեղեցու դավանաբանությունը, ձևավորված նվիրապետական կարգը և ծիսական-արարողական համակարգը, ժողովրդին մատչելի ու հասկանալի ձևով ներկայացնել համաքրիստոնեական և մեր երջանկահիշատակ հայրերի հոգևոր ժառանգությունը, ինչպես ժամանակի պահանջներին համեմատ այդ կատարեցին Կերսես Թևորմալին և Գրիգոր Տաթևացին, իսկ մեր ժամանակներում պահանջում էին կատարել Գարեգին Հովսեփյանն ու Կարապետ Կախկոպոս Տեր-Մկրտչյանն իրենց ոգեշունչ ու ազգանվեր բարոգներով:

Ահա թե երջանկահիշատակ Գարեգին Հովսեփյանը դեռևս 1908 թվականին Մատթեոս Բ. Կաթողիկոսի ընտրության շրջանում ինչ էր գրում, «Հայոց վերածնության խարխիւր քրիստոնեական ավետարանական վերականգնությունն է, մեր դարավոր և սրբազան ժառանգության բարե-

փոխությունն ու բարեկարգությունը, որովհետև առանց բարոյական վերածնության ամենայն մի շարժում հաստատված է ավագի վրա»։ Իսկ սա թելադրում է առաջին հերթին անխաթար ու անաղարտ պահել մեր հավատը ոտնձգություններից, որ ցանկանում են կատարել զանազան աղանդներ։ Ահա թե ինչու մեր նորընտիր Հայրապետը այդ նույն ժողովում, խոսելով այս հարցի մասին, ասաց, թե մեր Եկեղեցին պիտի վերստին այնքան կենսունակություն կատանա, որ շթույլատրի օտար քարոզիչներից գալ այստեղ ու լցնել մեր հոգևոր դատարկությունը։ Պետք չէ այս առիթով մեղադրել որևէ մեկին, այլ լծվել աշխատանքի։

Իսկ այդ հարցում ամենակարևոր աշխատանքը նոր սերնդի հոգևորականության պատրաստության հարցն է։ Ըստ նրա՝ այստեղ մեծ դեր ունի հոգևոր ճեմարանը, որը սիրտն է մեր Եկեղեցու հոգևոր հաստատությունների, և նրան պետք է վերադարձնել Գևորգյան ճեմարանի փառքը։

Եվ շատ կարևոր է, որ Վեհափառը շեշտը դնում է հոգևորական նոր սերունդ դաստիարակելու վրա, չէ՞ որ այսօր փաստ է, որ եկեղեցական համակարգում խիստ նվազել է քահանաների դերը, և նրանք, որքան էլ ցավալի է, վերածվել են ծիսակատարություններ անողների։ Եվ որ քահանաները հին օրերի օրինակով կրկին պետք է վերածվեն քարոզիչների, դա կասկածից դուրս է։ Հենց դա է Եկեղեցու այսօրվա ճգնաժամից դուրս գալու կարևոր խնդիրներից մեկը։ Իսկ այդպիսի իսկական քարոզիչ-քահանաներ պետք է կրթի ու դաստիարակի և պատրաստի հոգևոր ճեմարանը։ Կարևոր է և ծխական համայնքների վերականգնումը։ Քանի որ դրանց բացակայության պատճառով է, որ կենդանի կապ չկա ժողովրդի և քահանաների միջև։ Ահա թե ինչու որևէ ծիսական արարողություն կատարելու համար հավատացյալները չգիտեն, թե ում դիմեն։ Նաև սա է պատճառը, որ որևէ հարցի պարզաբանման կամ ընդհանրապես այսօր ծագած հոգևոր ծարավը հագեցնելու համար նրանք ստիպված դիմում են օտարամուտ քարոզիչներին, որոնք յուրաքանչյուր շրջանում բացված ժողովարանների միջոցով ստեղծել են կազմակերպված ներքին ցանց, որի միջոցով էլ այժմ փաստորեն զբաղված են հոգեորսությամբ։

Այո, Հայ Եկեղեցին և ազգը եղել են միասնական, և այժմ ավելի պետք է ամրանա այդ միությունը, իսկ դրան այնքան՝ կարևոր դեր է վերապահում Վեհափառ Հայրապետը։ Դրան պետք է նպաստի և «Հայաստան» Համահայկական Հիմնադրամը։ Ահա թե ինչու է մեր նորընտիր Ամենայն Հայոց Կաթողիկոսն այնպես եռանդագին կոչ անում գորավիզ կանգնել նրան։ Չէ որ նաև հիմնականում այս կերպ կարելի է ավելի սերտացնել Հայրենիք-Սփյուռք կապերը և դրանք նպատակամղել հայրենիքի վերաշինության ու գորեղացման նվիրական գործին։

Մեր Եկեղեցու նորընտիր Հայրապետը լայն ճանաչում ու հարգանք ունի համաշխարհային հոգևորականության շրջանում։ Նա Մերձավոր Արևելքի Եկեղեցիների Խորհրդի պատվավոր նախագահն է, և հավատացյալ հոտը լիահույս է, որ այսուհետ առավել ևս կբարձրացնի Հայ Եկեղեցու հեղինակությունը միջազգային ասպարեզում, և Եկեղեցիների Համաշխարհային Խորհրդում ըստ արժանվույն կներկայացնի մեր Եկեղեցին և ամենայն կերպ կնպաստի քույր Եկեղեցիների է՛լ ավելի մերձեցմանը, անխաթար պահպանելով Հայ Եկեղեցու պատմականորեն ձևավորված հոգևոր ինքնությունը։

Հարկ է վերանորոգել նաև նախկին Խորհրդային Միության տարածքում գոյություն ունեցող այժմյան թեմական բաժանումը և այն հարմարեցնել այսօրվա հոգևոր-քաղաքական-մշակութային պահանջներին: Հաշվի առնելով այն իրողությունը, որ մեր Եկեղեցու թեմական առաջնորդները հանրապետությունների ղեկավարների կողմից միշտ էլ ընդունվել ու դիտվել են որպես տեղի հայկական համայնքների առաջնորդներ ու ներայացուցիչներ, անհրաժեշտ է թեմական նոր բաժանում կատարել նախկին ԽՍՀՄ տարածքում և հարկ է, որ ընտրվեն այնպիսի թեմական առաջնորդներ, որոնք հոգևոր բարձր իմացականության հետ միասին կարողանան ըստ արժանվույն ներկայացնել իշխանությունների առջև հայ համայնքը և ի վիճակի լինեն լուծել ծագող բազմաթիվ հարցերն ու խնդիրները:

Կաթողիկոսական գահակալության առթիվ իր քարոզում Վեհափառ Հայրապետն ասաց. «Հայաստանյայց Եկեղեցին պիտի կատարի իր ազգային դերը, որովհետև ան անքակտելիորեն շաղախված է ողջ հայոց պատմության և ճակատագրի հետ»:

Այդ նույն հասկացողությամբ է, որ մեր Եկեղեցին պիտի շարունակի զորավիգ կանգնիլ Արցախի մեր հարազատ եղբայրներուն ու քույրերուն, անոնց հերոսական մաքառումին մեջ, ի պաշտպանություն անոնց արդար իրավունքներու»:

Եվ ի հաստատումն այս խոսքերի՝ Վեհափառ Հայրապետը քիչ օրեր անց կատարեց իր հովվական առաջին այցելությունը Արցախի հավատացյալ հոտին՝ նրանց սրտերը լցնելով հպարտության, հավատի և երախտագիտության զգացումներով:

Մայր Հայրենիքի և Սփյուռքի հարաբերությունների պատմության մեջ գրվեց մի նոր փայլուն էջ և դա ապրիլի 3-ին Մայր Աթոռ Սուրբ Էջմիածնի նվիրական ու դարավոր կամարների տակ գումարված Ազգային-Եկեղեցական սրբագումար Ժողովն էր, որը դուրս գալով եկեղեցական բնույթից՝ վերածվեց ազգային-հայրենասիրական մի խանդավառ տոնակատարության, քանզի Լուսավորչի գահին բարձրացրեց 131-րդ արժանավոր Գահակալին ու Հային՝ նրան ավանդելով պատմական մի հրամայագիր՝ բարեզարդել, պայծառացնել ու պանծացնել Հայ Եկեղեցին ի փառս Հավատի ու Հայրենյաց...

ԳԵՎՈՐԳ ԴԵՎՐԻԿՅԱՆ